



## აჭარის ავტონომიური რესპუბლიკის უმაღლესი საბჭოს თავმჯდომარის

### განკარგულება №6

## საზოგადოებრივი მაუწყებლის აჭარის ტელევიზიისა და რადიოს მრჩველთა საბჭოს წევრთა - მრჩველთა კანდიდატურების შესარჩევი ღია კონკურსის გამოცხადების შესახებ

27 აგვისტო, 2019 წელი

დაბა ჩაქვი

„მაუწყებლობის შესახებ“ საქართველოს კანონის 35<sup>ე</sup> მუხლის პირველი-მესამე პუნქტებისა და აჭარის ავტონომიური რესპუბლიკის უმაღლესი საბჭოს რეგლამენტის მე-19 მუხლის მე-2 პუნქტის „ო“ ქვეპუნქტისა და 143-ე მუხლის პირველი-მესამე პუნქტების შესაბამისად:

1. გამოცხადდეს საზოგადოებრივი მაუწყებლის აჭარის ტელევიზიისა და რადიოს მრჩველთა საბჭოს 4 წევრის - მრჩველის კანდიდატურის შესარჩევი ღია კონკურსი.

2. მრჩველობის კანდიდატი უნდა იყოს საქართველოს მოქალაქე, საზოგადოებრივი აღიარებისა და ნდობის მქონე პირი. მას უნდა ჰქონდეს მაგისტრის ან მასთან გათანაბრებული აკადემიური ხარისხი და არანაკლებ 10 წლის მუშაობის გამოცდილება, მათ შორის, 5 წლისა - ჟურნალისტიკის, ადამიანის უფლებათა დაცვის, საფინანსო, ელექტრონული კომუნიკაციების, სახელოვნებო, სამწერლო ან/და სამეცნიერო-პედაგოგიურ სფეროში.

3. ყველას აქვს უფლება, წარადგინოს მრჩველობის კანდიდატურა. მრჩველობის კანდიდატთა წარდგენის თაობაზე განაცხადები წარდგენილ იქნეს 2019 წლის 26 სექტემბრის ჩათლით.

4. მრჩველობის კანდიდატის წარდგენის თაობაზე განაცხადები შეიტანება აჭარის ავტონომიური რესპუბლიკის უმაღლესი საბჭოს თავმჯდომარის სახელზე, წერილობით შემდეგ მისამართზე: ქობულეთის მუნიციპალიტეტი, დაბა ჩაქვი, ბადრი მეგენეიშვილის ქუჩა №25 ან ელექტრონული ფოსტის მისამართზე: [contact@sca.ge](mailto:contact@sca.ge).

5. მრჩველობის კანდიდატის წარდგენის თაობაზე განაცხადს თან უნდა ერთვოდეს:

ა) კანდიდატის CV;

ბ) კანდიდატის საქართველოს მოქალაქის პირადობის მოწმობის/პასპორტის ასლი;

გ) კანდიდატის მიერ მაგისტრის ან მასთან გათანაბრებული აკადემიური ხარისხის მიღების დამადასტურებელი დოკუმენტის ასლი;


დ) იმ დოკუმენტის ასლი, რომელიც ადასტურებს კანდიდატის არანაკლებ 10 წლის მუშაობის გამოცდილებას, მათ შორის, 5 წლისა - ჟურნალისტიკის, ადამიანის უფლებათა დაცვის, საფინანსო, ელექტრონული კომუნიკაციების, სახელოვნებო, სამწერლო ან/და სამეცნიერო-პედაგოგიურ სფეროში;

ე) საზოგადოებრივი მაუწყებლის აჭარის ტელევიზიისა და რადიოს განვითარების კონცეფცია.

6. საკონკურსო დოკუმენტაციის მიღება უზრუნველყოს აჭარის ავტონომიური რესპუბლიკის უმაღლესი საბჭოს აპარატის საორგანიზაციო და საქმისწარმოების დეპარტამენტმა.

7. განკარგულება საჯაროდ გამოცხადდეს 2019 წლის 27 აგვისტოს და ძალაში შევიდეს საჯაროდ გამოცხადებისთანავე.

8. განკარგულება შეიძლება გასაჩივრდეს საჯაროდ გამოცხადებიდან 1 თვის ვადაში ბათუმის საქალაქო სასამართლოში (მისამართი: ბათუმი, სტეფანე ზუბალაშვილის ქ. №30).



დავით გაბაიძე